



21 Julai 2014
21 July 2014
P.U. (A) 217

WARTA KERAJAAN PERSEKUTUAN

FEDERAL GOVERNMENT GAZETTE

KAEDAH-KAEDAH CUKAI PENDAPATAN
(ELAUN MODAL DIPERCEPAT) (KELENGKAPAN
TEKNOLOGI MAKLUMAT DAN KOMUNIKASI) 2014

*INCOME TAX (ACCELERATED CAPITAL ALLOWANCE)
(INFORMATION AND COMMUNICATION TECHNOLOGY
EQUIPMENT) RULES 2014*



DISIARKAN OLEH/
PUBLISHED BY
JABATAN PEGUAM NEGARA/
ATTORNEY GENERAL'S CHAMBERS

AKTA CUKAI PENDAPATAN 1967

KAEDAH-KAEDAH CUKAI PENDAPATAN (ELAUN MODAL DIPERCEPAT)
(KELENGKAPAN TEKNOLOGI MAKLUMAT DAN KOMUNIKASI) 2014

PADA menjalankan kuasa yang diberikan oleh perenggan 154(1)(b), dan perenggan 10 dan 15 Jadual 3 kepada, Akta Cukai Pendapatan 1967 [*Akta 53*], Menteri membuat kaedah-kaedah yang berikut:

Nama dan permulaan kuat kuasa

1. (1) Kaedah-kaedah ini bolehlah dinamakan **Kaedah-Kaedah Cukai Pendapatan (Elaun Modal Dipercepat) (Kelengkapan Teknologi Maklumat dan Komunikasi) 2014**.

(2) Kaedah-Kaedah ini berkuat kuasa mulai tahun taksiran 2014 hingga tahun taksiran 2016 kecuali kaedah 8.

(3) Kaedah 8 berkuat kuasa mulai tahun taksiran 2014 hingga tahun taksiran 2018.

Tafsiran

2. Dalam Kaedah-Kaedah ini—

“kelengkapan teknologi maklumat dan komunikasi” ertinya kelengkapan teknologi maklumat dan komunikasi sebagaimana yang dinyatakan dalam Jadual;

“pembelian apa-apa kelengkapan teknologi maklumat dan komunikasi” termasuklah pemasangan kelengkapan itu.

Pemakaian

3. Kaedah-Kaedah ini terpakai bagi seseorang pemastautin di Malaysia, berkenaan dengan perbelanjaan modal yang dilakukan oleh orang itu dalam tempoh asas bagi suatu tahun taksiran daripada suatu punca yang terdiri daripada perniagaannya

berhubung dengan pembelian apa-apa kelengkapan teknologi maklumat dan komunikasi yang digunakan bagi maksud perniagaan itu.

Peruntukan menyifatkan berhubung dengan perjanjian sewa beli

4. Jika orang yang disebut dalam kaedah 3 melakukan perbelanjaan modal di bawah suatu perjanjian sewa beli bagi pembelian apa-apa kelengkapan teknologi maklumat dan komunikasi bagi maksud perniagaan orang itu—

- (a) orang itu hendaklah dikira sebagai tuan punya kelengkapan teknologi maklumat dan komunikasi itu; dan
- (b) perbelanjaan modal yang dilakukan oleh orang itu dalam tempoh asas bagi suatu tahun taksiran hendaklah dikira sebagai bahagian modal daripada apa-apa bayaran ansuran atau, jika terdapat lebih daripada satu bayaran, daripada agregat bayaran yang dibuat oleh orang itu di bawah perjanjian sewa beli itu dalam tempoh asas itu.

Elaun permulaan

5. Orang yang disebut dalam kaedah 3 layak untuk mendapat elaun permulaan yang diperuntukkan dalam perenggan 10 Jadual 3 kepada Akta yang hendaklah bersamaan dengan satu per lima daripada perbelanjaan modal yang dilakukan bagi pembelian apa-apa kelengkapan teknologi maklumat dan komunikasi.

Elaun tahunan

6. Orang yang disebut dalam kaedah 3 layak untuk mendapat elaun tahunan yang diperuntukkan dalam perenggan 15 Jadual 3 kepada Akta yang hendaklah bersamaan dengan empat per lima daripada perbelanjaan modal yang dilakukan bagi pembelian apa-apa kelengkapan teknologi maklumat dan komunikasi.

Ketidakpakaian

7. Kaedah-Kaedah ini tidak terpakai bagi seseorang jika dalam tempoh asas bagi suatu tahun taksiran—

- (a) orang itu telah diberikan apa-apa insentif di bawah Akta Penggalakan Pelaburan 1986 [*Akta 327*];
- (b) orang itu telah diberikan elaun pelaburan semula atau elaun pelaburan masing-masing di bawah Jadual 7A atau 7B Akta;
- (c) orang itu telah diberikan apa-apa pengecualian di bawah seksyen 127 Akta; atau
- (d) orang itu telah layak bagi suatu potongan di bawah mana-mana kaedah-kaedah lain yang dibuat di bawah seksyen 154 Akta.

Penarikan balik elaun modal

8. Jika seseorang menjual, memindahkan, memindahkan hakmilik, menyerahkan atau memberikan hakmilik sesuatu kelengkapan teknologi maklumat dan komunikasi dengan atau tanpa balasan pada bila-bila masa dalam masa dua tahun dari tarikh pembelian kelengkapan teknologi maklumat dan komunikasi itu, elaun yang disebut dalam kaedah 5 dan 6 berkenaan dengan kelengkapan teknologi maklumat dan komunikasi itu hendaklah ditarik balik dalam tempoh asas bagi tahun taksiran yang orang itu menjual, memindahkan, memindahkan hakmilik, menyerahkan atau memberikan hakmilik kelengkapan teknologi maklumat dan komunikasi itu dengan atau tanpa balasan.